

voll anders (T/M: Edi Schäfer)

So ungefähr 50 santi lang, drü Kilo und 200 Gramm
Schwarzi Haar, zwei Auge gross und rund
Chum fürecho und anegleit, hät me ire Paula gseit
Da isch si gsi, ganz neu und frisch und gsund

Isch grösser worde wies halt eso gaht
Ganz brav und lieb, fürs Läbe voll parat

Er isch nöd würkli planed gsi, was wotsch da mache, schicksch di dri
Und gliich händ alli Freud am Buebli gha
Drum händs em dänn au Hugo gseit, er hät gli gschnallt, da bin ich gemeint
Me merchts scho guet, das git emal en Maa

Isch grösser worde wies halt eso gaht
Ganz brav und flott, fürs Läbe voll parat

Chorus: Wo das schlussäntlich anefüert, me weiss es nonig genau
Villicht lauft alles riibigslos, villicht stahsch vill im Stau
Au d'Paula und de Hugo, die hoffed nur uf eis
Dass s Glück emal churz ineluegt uf irer Läbesreis

Ja irgendwänn isch's halt so wiit, au Mueter meint, jetzt isch es Zyt
Zersch Chindsgi-Groove und dänn gaht's ab id Schuel
D'Paula findts det zimkli läss, nur sFranz, das tunkt si chli en Chäs
De ganz Tag Mathi fänd si hingege cool

Wies halt so gaht, nüün Jahr sind gli verbii
Jetzt sett si öppis wärde, und das möglichscht glii

Em Hugo sölls nöd besser ga, muess d'Meersäuli diheime laa
Frau Gmür im Schuelhus Dorf wartet uf in
De Fliissigscht isch er scho nöd gsi, dank gnueg Talänt bliibt er debii
Findt ab und zue es machi sogar Sinn

Wies halt so gaht, nüün Jahr sind schnäll verbii
Jetzt sett er öppis wärde und das möglichscht glii

Chorus: Wo das schlussäntlich anefüert, me weiss es nonig genau
Villicht lauft alles riibigslos, villicht stahsch vill im Stau
Au d'Paula und de Hugo, die hoffed nur uf eis
Dass s Glück emal churz ineluegt uf irer Läbesreis

Paula

Nach de Sek hätt dänn d Paula e Stifti gmacht, als Informatikeri. D'Eltere hettet si zwar lieber ufere Bank
im KV gseh – immer no e sicheri Sach, händs gemeint – oder suscht halt als Pharmaassistäntin. Aber ebe
mit être und avoir hät si immer nonig vill chöne aafange und mit Sälbele und Pillele no vill weniger.

Unihockey isch iri grossi Liideschaft gsi näbed em Computer. I de Lehr isch si zwar e chli eleige gsi als
einzigi Frau under luuter Manne oder besser gseit «fascht Manne». «Es chlises Update würd de meischte
scho nöd schade» hät si amigs troche gemeint. Si isch öppe dra cho, wänn si doch emal nümme ganz druus
cho isch, au vom Lehrmeischter.

Wo si dänn aber a de LAP als Jahrgangsbeschti es lockers 5.9 anegleit hät, isch au dä e chli is Studiere
cho.

Hugo

D'Meersäuli hät de Hugo scho längst de chline Schwöschter vermacht und dass me öppis wärde sett, hät
em nöd unbedingt iiglüüchtet. I de Schuel ischs em gar nöd so unwohl gsi, au ohni Lehre isch er
einigermasse bi de Lüüt gsi und so hät er gnueg Zyt für für di wichtige Sache im Läbe gha. Vor allem i de
Pfadi isch er richtig ufblüet und hät's bis zum Abteiligsleiter bracht. Drum isch er froh gsi, dass er's nach
de dritte Sek doch no is Gymi geschafft hät. Aber ebe au das isch emal fertig und was jetzt?

Paula

Und dänn hät si das Hammer-Inserat gseh. E Stell im Support bi irgend sonere Hochschuel hinter de Sihlposcht. Mit dene Note isch für d Paula d Bewerbig natürlig e reini Formsach gsi. D'Arbet hät ere Spass gmacht. Es isch irgendwie no es guets Gefühl gsi, wänn all die gschiide Lüt ganz liecht verzweiflet an Schalter cho sind und nümme wiiter gwüsset händ. Meischdens händs zwar gseit, es gängi nöd. Bi dene vom Französisch hät si sich amigs sogar bsunders Müe gä. Nachtragend isch si nöd gsi.

Hugo

«Wänn nöd weisch was studiere, dänn gang doch a PH und wird Lehrer!» De Elch, en Kolleg vo de Pfadi hät em Hugo dä heissi Tipp gäh. Es seigi total easy det und erscht no diräkt näbed em Bahnhof. Und jetzt isch er bereits im 3. Semesterschter vo de Primarlehrerusbildig, will das nöd eso lang gaht.

So ungefähr 20 santi lang und sicher fascht 200 Gramm

Drum staht de Hugo bi «voll anders» aa

Au Pommes Frites git's, Salat dezue, hüt hät si Hunger, doch s git gnue

Das Schnitzel, das muess si ganz einfacht ha

Doch won si dänn churz vor de Theke staht

Liit det genau no s letschti Stuck parat

De Hugo wartet vorne draa, er dreht sich um, seit: Chasch es ha!

Doch da isch es um d Paula plötzlich gscheh

Er gseht nur no die schwarze Haar, d Auge gross und wunderbar

En sonnen Maa hät si no gar nie gseh

Si ässed s'Schnitzel mitenand

Und sithär gseht me si nur Hand in Hand

Chorus: Wo das schlussäntlich anefüert, me ahnt's jetzt zimmi gnau

D'Wält gseht plötzlich farbig us und nümme chalt und grau

Für s PH-Glück da git's nur eis, muesch halt id Mensa gah

Und det stasch dänn am Beschte bi «voll anders» aa



Baumschnitzer: „Lazy“ John Wilhelm